

Diyona

Lainuwanega

Niga bukanemo ba i giuweda te Maimaituwa ena nuwavaina lava matabudi lisidimo mote Is-lael lavedi taudiġa. Maimaituwa, Diyona i yoge te taugiuwatana bi tana ya nawa Asaliya dobuna nophonemo bi Ninive tauninemo te mba lavedi sa miyamiyana ya giuwedi te edi gebogebo sa gosedi bi Maimaituwa sa voteyeteye. Bamoda mainana sa voiyena ba mote ima kovoġidi bi ya kavisuvisudi.

Diyona BADA i lau kasaġaiġaiye

¹ Laġan ġemota BADA i giu yovona Amitai natuna isana Diyona lisinemo gado, ² “Tam kwa nawa Ninive taunina dididiginemo bi lava lisidimo kwa lauguguya banina e kitedi te kauwa gebogebodi sa voivoiyedi taunana aubaina yà kovoġidi.”

³ Bi geġa te Diyona, BADA i lau kasaġaiġaiye bi eta tabuna i kaiwata. Te i nawa Diyopa tauninemo bi ġome waga i banavi i nawawanawa Spein. Wagana i wai maii bi i gelu te maso, BADA i naile kamaġe bi i nawa Talisis.*

⁴ Tedi a nawawanawa ba BADA yavala bagibagina i giukamaġe nisa pounemo te i talatalaġa ba nisa i wai labalabamana mai oya tabudi bi i wai nuwa nainaila kauwa te ġotona maso waga

* **1:3:** Talisis taunina ba Spein dobuna nophonemo.

i dousena. ⁵ Kamaina bi waga taunoyaena a naila tinatinamuli bi ġemoġemotaġa ai baġa saġa edi maimaituwa lisidiġa. Mba mulinemo a miya moito bi ġonāġona ai kulu yovo nisamo te waga ya tekateka. Bi nove waga nopo otinemo ba Diyona i kena kwavu.

⁶ Bi waga tauvelauyen a i nawa nove lisinemo bi i giuwena gado, “Tam bai aubaina kuna kena? Ku moito bi em maimaituwa lisinemo kwa laupali bamoda kalinam ya vaiye bi ya saguda te mote tama bulu.”

⁷ Kamaina bi waga taunoyaena ai ġemotidi bi a ogatalana gado, “I visu te ta koitili bi ta sibe kauwe te lava isana ena pilipili.” Sauginemo a koikoitili ba Diyona isana i laumaġata. ⁸ Kamaina bi ai talayena gado, “Ku giu, niga pilipilina lisidemo i tubuġħana ba aiyai tai wavu? Tam em noya bai? Tam bamo bi kuna nato? Dobu isana lavam? Tam em dam bamo lavedi?”

⁹ Diyona edi giu i waimunena gado, “Tagu Ĝibulu lavagu BADA, Maimaituwa taulauduneyena, tana mala, nisa bi dobu i voiyyedi.”

¹⁰ Laġannemo i giugiuwed i ba tedi a naila gulata bi ai talayena gado, “Kauwa kana gebo kuna voiye!” Waga taunoyaena a sibe te tana BADA i nainaile kamaġe banina tana kaikana i gei giuwedi. ¹¹ Kamaina bi yavala ma labamina i dididiga yababayaba bi ai talayena gado, “Bai kauwina lisimmo ka voiye bi labama ya lautattau?”

¹² Diyona i giuwedina gado, “Tagu egħi wavy te yavala bagibagina konai ġalo. Ko lagetigu te

nisamo ko pwalaġe yovoġegu, kaka daumola ya kena bi labama ya nuwaġavuka.”

¹³ Ĝome waga taunoyaena mote a ġoe te maso Diyona a pwalaġe yovoġe nisamo, taunana aubaina a lau ġaiġailisi te maso waga a nawe diyadiyamo. Bi geġa te a ġiu kasage bi yavalma labamina yaġolo te i saġasaġa yababayababa.

¹⁴ Kamaina bi BADA lisinemo ai baġana gado, “Aee BADA, ka laulaupali te niga lavana visuvisuna ena yawasana ka bwalina bi dabanemo kama peki. Niga kauwina tam em ġowana luvanemo ya tubutubuġa.”

¹⁵ Ĝome tedi Diyona a lageti te nisamo a pwalaġe yovoġe, te nisa maġemota i daumoli.

¹⁶ Niga mai kauwina a kitakita ba BADA a naile gulate bi lisinemo a lausewasewa bi kota BADA lisinemo a giuwapa te aubaina sa noya.

¹⁷ ✧BADA iyana dididiga i giukamaġe te Diyona i guda bi iyana bwaganemo i miyana laġan faiona bi dudubala faiona.

2

Diyona ena pali

¹ Diyona mba iyenina nophonemo bi BADA ena Maimaituwa lisinemo ² i laupalina gado,

“Oo BADA egħi pilipilimo
tagu lisimmo ei baġa bi kalinagu kuna vaiye.
Tagu nove dom nophonemo lava peki pekidi edi
gabumo sagu ei baġae bi kalinagu kuna
vaiye.

✧ **1:17:** Met 12:40

- 3** Kuna pwalağe yovoğegu bi e daululu
te nisa dibuotinemo e tava.
Bi ġome nisa wai velavelauna i sumatawagu.
Tam em labama i wai kwesitawagu.
- 4** Bi nopogumo e wai nuwanoġonogoġotana bena
kage
tagu tam lisimmo bi kuna kwavivaigu.
Bi geġa te em vanuwa waiyawa
kaka ya kita munaġe.
- 5** Tagu diyagu matabuna nisa taunaġa
bi nisa waidomdomnemo yawasigu
tausaġena e kabikasaġe.
Bi nisa ġaweqawedi dabagu a sumatawi.
- 6** Tagu e daululu yovona oya dibu otidimo.
Ġome waidom bekunemo biliwelokomo e
miyamiya
bi eta matabuna guduguduna,
bi geġa te tam BADA egu Maimaituwa kunai
yawasanigu.
Bi nisa waidomnemo kuna solu saġegu.
- 7** Laġannemo egu noġota i kovi,
bi e noġoti te niga egu yawasana damona,
ba ġome e noġoti makaiġem
bi lisimmo e laupali.
Bi noke em vanuwa waiyawemo kalinagu
kuna vaiye.
- 8** Lava mabai maimaituwa ġesaudi sa
laulauduneyedina,
ba Maimaituwa ena sagu a daboke.
- 9** Bi tagu tam ya kasaġesaġem
bi lisimmo ya lausewasewa.
Bai ya giugiuwapaena ba ya voiye.

Tam BADA yawasana tauvitegu.”

¹⁰ Kamaina bi BADA iyana i giuwe te Diyona i nawe diyadiyamo i waigilo kamağe.

3

Diyona BADA i voteyeteye

¹ BADA i giu yovo munağā Diyona lisinemo.

² Bi i giuwena gado, “Kwa nawa Ninive taun dididigi otinemo. Bi bai e giugiuvitemna kwa lauguguyae.”

³ Kamaina bi Diyona, BADA i voteyeteye bi i nawa Nineve taunina dididiginemo, luvana lağan faiona taunina sa babala koviye. ⁴ [✡]Diyona tauninağā i nawa bi i laulauguguya. Bi i laulauguguyana gado, “Lağan 40 matemimo sa kennakena bi mulinemo ba Ninive taunina BADA ya kagebogebo.” ⁵ Ğome Ninive lavedi Maimaituwa giuna ai sumağe. Kamaina bi ai anina te lava matabudi sa udi. Noke waibabada lisidimo te i yovo lava yababa lisidimo i laukamağe. Tedi gala yadiyadidi a kotedi bi a udiudi, niga mai a voivoiyena ba a wai mağati munağedi te a kuvakuvasa.

⁶ Lağannemo Ninive edi ġalibona lauguguya giuna i vaivaiye ba ena ani miya gabunemo i miya moito bi ġalibona galedi i kotekotena i kaikamağedi. Bi ani udi galedi i kotedi bi i miyatulu gobusemo.

[✡] **3:4:** Met 12:41

⁷ Ġalibona ena waibabada vaitedi edi giu bagibagina mba tauninaġa ai babali nawe lava matabudi lisidimo. Tana niga mainana i giu,

“Lava matabumi bi em ġamoġamo nananakidi te keikeilikidi mote bai koma kani bi koma tego. ⁸ Lava bi ġamoġamo matabumi ani udi galedi ko kotedi. Lava matabumi nuwemi tabutabudimo ko laupali bagibagi Maimaituwa lisinemo bi emi kauwa gebogebodi ko gosedi. ⁹ Mba mainana kaka male Maimaituwa ena medi dididiginemo nuwana ya vitale bi ya launuwatoiyeda te mote tama peki.”

¹⁰ Maimaituwa i kitedi te giukauwemo edi kauwa gebogebodi a gosedi, taunana aubaina i launuwatoiyedi bi nuwana i vitale te bai i giugiuwena mote ima voiye.

4

Maimaituwa ena launuwatoi bi Diyona ena medi

¹ Bi Diyona mote i wai nuwavisu bi i medi banina BADA lavedi mote i kovoġidi. ² [✳]Bi BADA lisinemo i laupalina gado, “Oo BADA laġannemo egħi malagaimo e miyamiya bi em yawasana e sibe aubaina mote ya giuwatawatam, taunana aubaina waigħapa e gose kamaġem bi e nawa Talisis. Tagu e sibem te Maimaituwa laulau kvivisvisum bi laulau nuwatoim, mote medimed i makaim. Tam em nuwavaina kenakena nonoġina aubaina, nuwam kuna vitale te mote ku kovoġidi.

[✳] **4:2:** Pot 34:6

³ ♦Taunana aubaina miya e daboka bi i visu te yà peki.”

⁴ Bi BADA, Diyona ena giu i wai munena gado, “Em sibe bai, dabanemo kwa medimedi.”

⁵ Ĝome Diyona taun i potiyovo kamaĝe bi i nawa beubeu yawaninemo i miyatulu. Ena kape i voye bi dibunemo i miya bi i waiwai mayavai te Ninivemo bai ya tubuĝa. ⁶ Kamaina bi BADA, Maimaituwa kai i wai anine te ĝome i duga saĝa, te Diyona ena wagulu i tubuĝa, te yai wagulu kauwa. Bi tana mba kaina i wai nuwavisu gulate.

⁷ Bi laĝan i sako olaolalemo Maimaituwa mwatamwata i giukamaĝe te mba kaina i koi wai poki. ⁸ Laĝannemo suwala i lovotava ba Maimaituwa suwala i voye te i wai poya gulata. Bi poya ma yavalina i lausuve te Diyona i poy-apoyana eete i laugilibubu. Ĝome i ĝoe te maso i peki. Bi i giuna gado, “I visu te yà peki kaka yà miyamiyana.”

⁹ Ĝome Maimaituwa, Diyona i giuwena gado, “Em sibe bai bi kaina dabanemo kuna medi?” Bi Diyona, BADA ena giu i waimunena gado, “Tagu egu medi gulata, i visu te yà peki.”

¹⁰ Kamaina bi BADA, Diyona i giuwena gado, “Tam kaina mote ku wadi ee ku wai duga bi kwa wai nuwaboyae. Niga kaina ba dudubala ĝemota nponemo i duga saĝa bi dudubala wai labunemo i poki. ¹¹ Giukauwa te niga taunina e launuwa-toyi, banina ei nuwaboya gulata te lava wapano 120 tausan i waimuli, mainana kota ĝamoĝamo wapedi. Ninivemo lava sa miyamiyana, tedi visu bi gebo sa voivoiyena mote si sibe.”

**Buk Baibel long Kakabai
Portions of the Holy Bible in the Kakabai language of
Papua New Guinea
Buk Baibel long tokples Kakabai long Niugini**

copyright © 2010-2016 Wycliffe Bible Translators, Inc.

Language: Kakabai

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-05

PDF generated using Haiola and XeLaTeX on 11 Nov 2022 from source files dated 9 Oct 2020

8614ef9e-7279-5fda-a20a-4c1b45b2f51a